

方簡肅集
利

蘇平如學

PDG

善本

方簡肅公文集卷之六

誌銘

明正奉大夫正治卿廣西左布政使震竹
周公墓誌銘

嘉靖元年正月某日是爲左方伯周公發引
之辰先一月其子國子生懋憲奉林方齋汝
英內翰所狀公事行來乞銘予雅知公誼不
容_得後_公諱正隆字紹立姓周氏別號震
竹其_九自河_走閩長樂起居郎百讓公始

徙莆城南制。息菴再徙清江。歷曾祖道初
祖尚文。至父累贈知府公坦。始領鄉薦。官武
隆教諭。公生于官所。幼穎悟。長益有文名。大
爲提學周時可先生所器重。屢置首選。成化
庚子。錄于鄉。甲辰。成進士。爲紹興府推官耳。
目所聞見。輒弗忘。民有訟。某日因晒穀。鬪死
其兄者。公曰。是日雨焉。得爭晒訟者。首伏灶
丁緣逋。負得歸。所鬻子鰥而復業者。得有室
皆公力也。尺籍隸遠衛。曠歲不勾。例解查公。

白當道以文移代諸暨壽姓者歐死邊氏子
愆罪自殺有司各論抵罪公獨抵殺人者邊
冤竟伸餘姚民爭草蕩不決公堤沙漲可耕
者量給之裒六十里人志其惠號周堤由是
才名大振辛亥召拜監察御史清理河南山
東與近畿馬政別馬牝牡定輸駒例民坐是
困者頓颺都御史王某以開邊落職賂貴近
謀復公率同官劾寢其事丙辰丁內艱己未
覃恩贈父如其官母張氏太孺人配吳氏封孺

人服闋再除俸還報甚急

廷議遣大將出京軍討之公疏寇未入境而京軍所過重爲民患宜專責守臣便

上從之庚申按部江西都指揮何昇挾巨璫勢以傲兩司南康知府某不職公皆劾罷之百僚惴惴無敢恣以怠壬戌還朝適災異求言詔下公疏六事皆見嘉納是歲出知太平府政如紹興時下車首清滯獄平反甚衆甲子饑公斥俸給出公帑爲粥以食饑民活數千人

窮逼鬻妻者例贖還之

奏減秋糧城輒凡若干萬又陳採濟貧軍等五
事開通河道等十事皆切地方利病

上下所司覆議多見施行以績最得加贈父母
加封吳恭人正德戊辰陞雲南按察副使追
復土官所匿符驗當道才之明年改江西江
西人聞公來大喜有誣西平忠武王李晟之
後者公爲直之人咸稱快庚午擢廣西按察
使尋擢右布政使轉左皆仍廣西公旣久於

其地興滯補弊易舊觀人方仰以大用而
公引年歸矢丙子歲也公襟度夷曠識見敏
達縱橫變化率不出繩墨之外與人交常折
位勢不遺貧賤當官臨事雷厲風生俄而開
朗澄霽人莫能測公雖職有司實與藩臬御
史分理庶政政與民宜旣去人益思之故紹
興太平皆有去思之碑旣家食祠宇祭田則
身任之祖產則讓兄之子族人待以塋親戚
待以舉火者何啻廿餘家亦足振頽俗也公

粹於經學所著有詩經孟子主意中庸大學
口義指南錄又有奏稿出巡錄詩文集藏于
家所造就多名士公生以景泰癸酉六月二
十六日卒以正德庚辰八月十六日享年六
十有八吳恭人先公卒側室徐氏張氏子男
六人長懋官靖江王府典膳次懋光貢士皆
吳出次懋憲徐出次懋賓張出次懋寰懋騫
皆徐出女二長適顧同知文時子一思次許
字予族孫左布政使璘子宜孫男十一孫女

八墓在胡公里寶勝院故墟爲四竈中左已
塋吳恭人中右今以寔公又右又左則待徐
張公未卒先十三日懋憲還自國學公語之
曰吾近嘗備錄平生履歷蓋絕筆也汝其志
之故茲乞銘懋官等特屬懋憲奉狀以來遵
遺言也銘曰

有銛者器試廼剗犀曾是鉛刀玉切而泥
吁嗟乎公才與政宜爬梳剖割爲吏者師
式履名途四紀于茲忽如其歸公也弗疑

世曷云短澤則永垂於昭萬年視我銘辭
勅封承德郎吏部考功司主事東樓劉先
生墓誌銘

仁者壽賢者貴天之所以償諸人也然有不
盡然者或者未遽償之而償之於其子若孫
歟若吾友東樓劉公不足徵乎公諱槃字學
賢東樓其所自號先世居莆奉谷里之鰲山
曾祖武起家進士官至廣東提學僉事復析
居今城左金橋祖鏞以旌年得

恩詔冠帶父淵偶儻有風度解新昌分教歸日
每會客高談暢飲忘其貧且老母鄭氏孺人
齊壽善相公性仁孝能承父志客至不待命
出供具不足足於市族鄙之寒飢者弱弗植
者收卹之若不及初不問力重輕也坐是家
日落公不爲意公心地夷曠不飾邊幅與人
交久益有恩意論事不求甚異而亦罔不循
軌人以故親信之不知者猝以橫加漠不與
較嘗貸於人償而復責公識其日月甚的其

人乃欲誓以自是公遽掩其口曰吾忘之吾忘之別貸重償焉其存心之厚類如此公少聰敏讀書輒解大義爲文若宿構者翁國博端之授徒也無慮數百人獨竒公因妻以女公試于私多占上第六舉于鄉不遇然名隱然動四方弘治癸亥甘別駕文紹聘教其子有成潯人爭師之鄉長老與仕而休者納交恐後旣歸歲遺書問不絕蓋公雖不遇而其不忘於人者固如此也公由是無進取心晚

精李虛中術卽生年月日所值支干與所屬之宿配合寃其旺相孤虛以知人貧賤富貴壽夭多驗嘗自歎曰吾命固應爾吾何自苦爲時考功君方燥髮恒指以語人曰畢吾志者其在此兒耶正德甲戌考功君果連第進士授刑部主事久之公往視考功君隨念新昌公及鄭孺人遂歸侍歲適大比提學姚公強入試辭曰某出京時士大夫亦以是見風者然不知某無此念久矣識者謂公知命旣

復奉新昌公命視考功君至則君已選入吏部三閱月合刑部考三載績最封公如其官翁暨陳氏婦俱安人公躬被命服子婦咸在烏紗珠翟交相輝映入謝

闕庭

天顏咫尺又爲有官封者始遇也公感激圖報訓勅考功君嚴於初初君成進士時公貽書戒之曰祖宗積德以有今日爾其自檢押無貽官謗爲刑部時戒之曰刑民司命爾其慎

哉與其苛也寧縱至是之戒則曰考功之予
奪人猶法官之生殺人也爾尚滋慎之哉凡
此公得志所能自爲者蓄而弗施故以教其
子也戊寅公以翁安人孫玄歸渡江得疾臥
舟中至嘉興遂不起時三月二十四日距生
成化丁亥正月二十九日享年五十有二當
疾革語翁曰死生數也吾何憾第父母欲見
吾與汝以命服侍自娛而自負之死不瞑目
耳公之不忘其親也乃如此哉計聞遠邇莫

不傷悼考功君痛絕復甦奔至喪所扶襯還
卜公幽宅弗吉而連執新昌公鄭孺人之喪
弗遑再卜廼先塋公祖父母諸姑叔母凡七
喪亟營南力里大王山之原爲宅四竈舉公
與新昌二喪合窆焉而虛其左之右爲翁壽
藏公子男一卽考功君勲女三適黃應奎張
世達吳文香皆隸族孫男二長塤議婚鄭特
御光琬女次坤議婚林大叅富女孫女二長
許字予姪貢士重熙子攸躋次幼未行嗚呼

公年踰中身不爲不壽鬱之于前貴之于後
道不行於身而行於其子天果何負於公哉
考功君將葬持鄭正鄉予成狀來謁銘予難
知公狀又鄭君作不可不銘銘曰
嗚呼此劉東樓公之藏其身弗章其澤則
長我銘不忘世有令芳

明威將軍興化衛指揮僉事洪公父子姑
婦合塋墓誌銘

洪上世汴之固始清風鄉人王父諱保保生